

四庫全書

集部

欽定四庫全書

雙溪集卷十三

宋 蘇籀 撰

啓

代仲虎兄回蔣揚州啓

右某啓叨塵上賸俾代王言懇避莫遑兢營靡措愧我  
朋好稽馳謝牋况夫樞袞之家朝紳所屬發颺朽鈍有  
賴題評某爝火依日月之明燥吻助雷風之震念憂患  
飄零之志敷討論潤色之文謂之稱職克家無能為役

期於致君及物但切疚懷切磋冀稟於清規顧待敢煩  
於妙斷至多溢美無乃過情某官軼邵杜之能蘊商偃  
之學以博聞而直禁域以宏才而肅外臺淮海賴於撫  
循朝廷之所欽注必歸臺閣實慰師言合并可期即駕  
四驪而入奏絨滕永好固當什襲而寶藏感佩實深敷  
染奚既

上樓仲輝牋

竊以文梓餘艤致厦成而川濟大鼎鸞輅佑餽飪暨皇

興天資正始之英自結睿文之簡賤疵本末栖託桑粉  
遐睎絳帳之徒稍際青雲之附頌文章而瞻德度接旨  
趣而覲儀刑賜超百朋見榮萬戶下風引領未至掃門  
瀆餐沐燕息之私猥干主記道古今盛美之譽準擬前  
脩上臣事君在雅懷之素蘊尊賢體道宜仁者之位高  
醫門不拒於病羸巫謁更增於默塞參陪省府望擢大  
僚出元常而督關西似仁傑以撫河北刺投櫛比予進  
後塵談吐春溫甄明萌意逮夫榆塞旋旆繡里晝行壽

親帶九牧之黃金過家養五鼎之豐膳巨鱗縱壑以快  
意威鳳覽輝而發祥匪曰易得之時卓爾殊常之禮實  
名望顯著天子倚重而咨嗟惟謨畫無雙元老稽疑而  
取式狐白不容反衣太阿非所倒持用善良則國不虛  
多君子而邦無難矧巖廊崇峻惟衡石度量之平畎畝  
搜求忘漁釣芻蕘之鄙其大綱既得雖小能不遺昔國  
僑取不颺之姿鄭事因茲鮮敗博陽寬通蕩之咎漢邊  
瑣彌精詳孫令君進善弗用而勿休房玄齡一物失所

而不忍要在存公而屈已歸於圖治而得人伏惟樞密  
閣下山峙庭中巍然特立洞達機會淵乎內明審諦閒  
詳夷易恬澹窺之間奧不見畛畦迎其鋒鏖未嘗肯綮  
湊措紳之宗嚮副黔黎之具瞻平陽規隨於咸京公琰  
翊亮於益部以今究度未足貴珍籀蕭颯雪髯弭忘兒  
女之好呻吟汗簡屢省聖賢之遺性理切磨利名迂闊  
偶竊主祠之三載敢議作者之七人羞矯激而惡奇邪  
務拙訥而尚樸直自詭林藪之浪漫不並才智之憂勞

龍鍾實然雌伏何較仰止施設未間空踈旨味紛然或  
求藥籠之物衆聲翕若未揜車鐸之音儻邂逅以薦颺  
增激昂而勉懋滔滔何算艱於辱契而辱知屑屑至卑  
罕或受容而受察誠自輸於肺腑殆將玷於坏陶歸依  
之情敷染奚既

賀王中丞啓

伏審顯膺休命擢領南司席絕百僚副清衷之重委臚  
傳萬口誠聖上之知人凡在聽觀莫不欽竦恭惟帝王

立本建中之道朝廷褒直盡下之辰揆策於無肯之途  
置器於永寧之地致君子小人咸適其分使庶工羣品  
各竭厥能寬恤疲羸觝排邪枉屈人兵於不戰消禍釁  
於未萌老成儀刑師表動靜虛佇諮訪之益允若憂勤  
之深百志惟熙萬問必理伏惟中丞閣下有專通新  
之學極切磨饜飫之功析蜀執戟之元文究魯感麟之  
旨趣澄清攬轡民譽攸歸模範賢關士風丕格不枉已  
以阿徇惟信道而全醇告老投閒窮而不愠弼違救失



辯且難當初無爵祿之心寧復得喪之患丘樊恬佚甘  
獨樂於無何軒冕儻來蹈中庸而克合遷陟二史超歷  
三臺減儀休之圃蔬仍平津之布被詞章藻鑒宜典掌  
於文盟繩正威風妙彌綸於國是顯顯大節郁郁高謨  
積著忠勞殆登疑弼然不鄙蓬蒿而徙睠罔憎莞庫以  
移交笑常情之猥卑見達人之大觀撲邀小吏偃伏下  
風曾何毫末之裨每借江河之潤叨塵選取出自稱知  
誤玷周行方依獎誘樞衣坐末或偶合於小言仰首朝

端真難逢之嘉會不願執鞭而求富幸觀極筆以談王  
欣戴之私數頌難悉

擬荅館職謝啓

伏審待對北門敷陳切務進直東觀典校秘文公言所  
推僉聽胥穆竊惟隆儒大本精選掄樂育之途待士最  
高號刊述是正之職廣經籍而考閱得英俊之朋游皇  
王之學並列其間公輔之儲多從此出某官陞華賢路  
擢秀藝林研精黃卷之言宜感青藜之照過彤簡管深

用撫謙獲披芬紉之章欲致酸瘠之愈珍藏為幸玩味  
何窮裁謝之私叙言罔既

謝轉朝奉郎牋

右籀啓准誥轉前件官者資品纖微惠澤沾被揆勞何  
取加秩過優朝渥難勝衷情悚慄近者緝熙盛典光顯  
丕稱備吉蠲之情文起琢磨之工伎恭惟徽宗皇帝詒  
謀施于罔極廣聲振乎無窮如日照臨在帝左右蒼黔  
所以固結精祲所以變和善繼祇承威靈於赫以為節

以壹惠豈足以颺鉅美而闡英猷加于衆名則可以紀  
闕圖而昭盛蹟蓋槐府玉堂妙形容而評擬鸞臺鳳閣  
俱會議而欽崇頌述雲漢之章象牒金積昭格神祇之  
護寶璽玉函發冊彤庭揭節命使於是珪幣緝惟馨之  
薦廟祔虔至腆之儀作民恭先惟聖純孝幸塵位著顧  
賤有司遭逢至榮豈期嘉賜聰察不遺於卑遠責成自  
有於度程命日量功邑荒濟務至於熙事之輯允賴公聽  
之明伏遇太師公相深喻誠明之源挾持禮樂之實不

以三公而易其介勸歌九叙而俾其成前著之籌每先知而應猝造膝之語不離道而稽經優如子產之擇能寬若巨源之多可勵精簡擢宏溥湛恩品彙自然得其宜百工安敢愛其力服冕放佞乘輅舞韶封博望以柔鬼方賞叔孫之趨時務補苴罅漏興造廢遺致鳳鳥而出河圖皆平生之素蘊殄神姦而拔泗鼎亦次第而垂成猶濫叨錫予之階溢聽升平之頌童髻耄杖咸欣觀於降康軍政國容頓復仍於舊貫上眷固尤為卓越勲

略難揜其魏莪念惟晞驥之蹤喻若為山之址苟聽其  
注務致思以竭才必得其官荷提攜而改觀無任依嚮  
感戴之至

謝轉朝散郎牋

右籀啓隹誥轉前件官者俟罪冗僚庀工陳力偉中興  
儀典之舊課攸司榮觀之還委辨落成計功予爵渙絲  
綸之惻怛陟班叙于崢嶸微夫草木之生浹此雲天之  
澤偃僂祇命跼蹐銜恩竊以階太平而禮樂興觀會通

而聖神作豈干戈倥傯之後廢文物聲明之昭誠習肄  
更始之秋副跂聲觀瞻之衆東觀曲臺之軼多得殘書  
總章衢室之間咨訪故實誠稽古制今之際聊息馬講  
藝於茲循枝派而尋根源酌沿革而求通變順遂品彙  
統叶天人豈庸末之所知賴真儒之爰立鴻惟主上備  
雕玉之龍駕建虹霓之修竿三辰旂旗前殿正衙之仗  
衛五色比象太室親祀之文容翕九奏萬舞以祝南山  
天日澄朗製六樂三雍以納和氣遐邇允詣蓋叔孫繇

絕要務則漢高知皇帝之尊張純荅詔引經而光武定  
禘祫之議昔號嘉會今固昌期典章著明英髦雜選抱  
圖謀鉉槩而訂議者殆國僑向戍之儔執斲鍛索鑰而  
精新者必歐冶工倕之侶裁成悉具允副責成殆將比  
三代而符同何特超二漢而融赫籀繆督監掌展究恪  
恭懷敗材傷錦之羞祇注瓦鎔金之戒幾希慶扁鐻輪  
之斷敢萌爵祿徐疾之心幸無苦窳之嫌各竭精能之  
伎恃上仁之陶沐俾下情之奔趨悉皆樂職之常姑免



鄙儒之誚近蒙奏最遂玷恩光再惟太師公相稟高明  
磊落之姿佐濬哲皇極之主嘉謨猷之疑遠摠美利之  
無窮大節大勞冠映前後一心一德致理清寧從容兩  
社之間進止弗失尺寸倉猝萬微之會酬酢不改色聲  
貫穿流略而潛涵師範羣儒之視儆自得乎度數紀律  
之表研精乎載籍根本之元發端右文贊翊洪造緝熙  
辦畫和洽光明措紳孰不盡乃心氓庶亦使同其利念  
朽瑣逖疎之迹採膚末盲進之勤假借甄收庇燾迂拙

擢方且激昂志見倣策事為叩閣懷牋未為報效執經授道久願依歸上特寬洪恕其懼懦

牋薛帥

伏念親仰楷模曩日朝右屢覲軒馭趨詣門闌珪璋宜瑞於宸廷符節每翔於外鎮蹉跎冗吏遵稟下塵麻大府而承流遙小邦之倅來屬爾更代之始唐突典記之曹寅緣恃舊而冒聞寢露狂斐而無避伏惟某官英槩特立幾識挺生文武兼資負澄清濟物之度中外迭晉

有侖儻曜世之奇牧害馬而伏馴俾亂絲之條理才藝  
第一當冠從臣政術絕優久淹侯社近者海邦搔動以  
資略而任分憂軍閫諮諏膺統督而莫要劇金珂畫角  
殄蜂蟻于立談羽檄捷書剿虵鼠于薰灌八州調護三  
方悉平信廟堂之知人寤冕旒之念績即隆名器以荅  
勲懃稠疊褒嘉殊常睠矚方且析介圭而遄覲穿豹尾  
之清班被卓爾之殊恩贊郁乎之文治猶貪藉輝蔭樂  
奉教條祈方隅永逸之規覲幕府從長之畫衷情嚮往

竿牘莫陳

迎吳郎中啓

伏審明綸妙擢廉按詳刑觀覽風俗之宜布宣詔令之  
意凝霜被節甘澤隨車凡在庇庥咸懷欽跂伏惟提刑  
中大郎中體履穹懿持操淵澄發遠韻於朱弦灑清飈  
于蘭雪國梁棟而民儀準詩老成而易丈人棠陰遺愛  
於東山駟乘全臨於閩部要塗粉省顯除星列於臺中  
直指繡衣威望震雄于天下儼范會之端委致綠林之

驚奔入境抗旌遠邇胥悅出教屬邑民吏肅雍蟠錯識  
評論若秋荼之密游刀辯畫溫然冬日之和清節不羣  
廟堂吹予召期非遠宸簡能遑講道而橫經峻特橐  
而簪筆籀塵勞冗吏漂寓衰蹤引領使塵先景星而快  
覩依歸民譽仰高山之誠懃欣慕之深造次罔述

回發解舉人謝啓

伏審秋闈遴選擢芳廉秀之林貢籍能書馳騫青冥之  
路有司樂育鄉黨推賢枉沐牋題過垂寵誨伏惟解元

先輩研六籍之魁士奮一上於英躔唾手雲衢仙桂空  
于月窟榮觀玉筍風雷化于春官勸駕及期公堂受遣  
頌詠之懇敷述奚殫

衢州張舍人啓

伏念近者解龜新命易倅大邦值中和樂職之秋屬右  
移更代之日願附青雲之素敢陪皂蓋之游天幸適然  
宦途優調伏遇知府舍人待制文盟藝苑人瑞國華早  
副眷求極當年之簡倚分憂重委付陪輔之屏藩奉計

雖許於三年偉業且搏於九萬高嶷忠肅悉振起予懦  
媿公大懿醇不苟沽於名譽鈐鍵惟謹薤水興謠優柔  
貴勝之藪淵敷崇禮義於防範摛飄萍流寓彈鋏歸來  
依投吏道之宗師仰止詞林之根蒂所祈寡陋尚幸燭  
微嚮慕之誠敷染曷既

衢州交代林通判啓

伏念昔陪朝籍並趨位著之聯懇避換州祇踐仁明之  
躅自惟塵迹每獲雲庥伏遇交代通判寺丞冠冕朝倫

圭璋民表修飾治績竦振能聲英妙貳州孰出高能之  
右代移更戍敢諮舊政之宜馳聳清規欣趨幸會揚劒  
津之糠粃實賴同塵襲柯山之芝蘭自茲借潤願交之  
懇染翰曷殫

迎衢州知府章郎中

伏審詔恩成命授委休嘉畿輔殿邦清選英重地接行  
朝之次舍民孚鄰境之甘棠持節斯來柅車允治伏惟  
知府郎中蚤騫翔於廷右久佚樂於侯封冠門闕于雲



霄儼朝紳之領袖粉闥迴首啓臺閣之榮塗金節按澄  
肅嶠瀧之憬俗根藝學於敏識裕風力於繁難詳諦通  
方警拔適當功名顯寵方且鼎來嶽鎮藩隅匪稽峻陟  
猶稔聆華聞嘗叩鈴齋既周旋於惠慈又貶枉于音誨  
不意抗塵之迹繆叨別乘之榮照矚所因參陪良幸頌  
詠之切攀述罔殫

回江少卿啓

伏念引嫌避地換鎮監州邦國不空衆倚賢侯為重獄

市所寄分安俗吏之勤九棘移書五雲拜貺輝華部室  
喜動蓬心伏惟宮使中大少卿炎漢子真之才章西晉  
稚川之襟趣資清秩峻羽儀平陟於天京禮備樂純劒  
履周旋於郊廟天將降任身享壽康譜牒前聞繼起歲  
誕於賢業搢紳推子墜華籍甚於班聯琳館湛研丹臺  
密邇籀臞儒自哂晚官念歸布氣噓枯曩祈受訣建言  
發贖敢望靈方丐聞霄壤之始元無碍突與之熒爝

婺州錢龍圖

伏審光膺選倚榮奉蕃宣冠內閣之寵名專輔邦之重  
鎮輟耳目之傑殿股肱之隅偃伏英風翹竦碩望恭惟  
知府龍圖太中有毗翊奮起之績得功名顯達之塗天  
授衆才世承丕德煥文華而外發勵公實以表強進自  
結於睿聰退仰酬於簡任裕民足國無非遠圖宣化承  
流更觀共理跋茲寶婺祐我台躔賞心坐獻於新亭游  
刃發硎於餘地柅車未幾興誦彌佳必獎璽書將膺冕  
服籀舊族哀裔薄官孤蹤曩貫籍於劔南今僑寓於浙

左仰高平夙幸恭梓以馬窮府倅拘縻徒賀賓而獨阻  
牋吳尚書

伏審光膺詔命再蒞雄藩棠郊爭跂于儀刑絳帳樂從  
于辯畫以常伯之夙望副舊德之精求好音布騰惠風  
翕若伏惟某官慈仁無擾柔輯警明勤恤素聞於天聰  
愛惠久洽於民譽端靖而密溫溫法從之宗工鴻博而  
文疑疑儒林之先覺雅韻常優於厚俗耆哲乃宜於牧  
人蓋源遠而流清由形直而影正方且來宣美意班寬

大之書感奮猷為歌中和之什寢結深知于黃屋豈淹  
揮翰於紫宸虎符一麾召擢伊邇鵬程九萬資略難量  
猶僑籍治城特紆顧眄其為忭懌實逾等倫

牋周尚書

伏審光膺褒詔寵畀近藩東浙虛股肱之邦中臺輟喉  
舌之老搢紳遵承而翕若吏民豫附以謳謠遐竦車塵  
馳想旌榮伏惟某官窺古人之奧適時務之宜超冠素  
雲之曹寤東隆赫攝空清鑒之長注倚精詳爵秩逢年

而九遷才具一日而千里委重文昌之樞要望鄰公衮  
之民瞻究宣周變之能加崇牧伯之柄俞音甚渥召節  
俯頒籀聽鄭履於朝端嘗獲親近買龔犢於部內實賴  
惠慈仰存誨之寅緣形庇庥之僭冒其為欣幸殆逾等  
倫

迎吳中大啓

伏審昨被詔除近釐符守任優舊德榮屈雅才凡百為  
僚允出幸會伏惟知府中大公清良弼方重嘉謨文采

風流蚤作藩垣之貴客諮諏策畫屢當帷幄之折衝歷  
試煩難愈新聞望覃布美懷于封部潤飾文辭于教條  
矧夫劍百鍊而繕藏自能應手驥千金而增價何必問  
途器博省臺抱本朝之雅意能高惠養察里落之嘯呻  
不鄙小邦稍恢餘刃徬趨風闕陝假蓋荆襄倒指計兩  
星之終飛書陳二天之契慕前修之牧相甘棠匪遙恃  
疇夙之陪游蒹葭繆倚願際和同之美允為魯鈍之光  
欽詠之衷敷述奚既

牋俞帥

恭審疇咨文陛均秩東藩魏我節制之尊雄毅撫綏之  
略聲騰疾置歡溢措紳矧叨庇於屬城實素承於風旨  
恭惟某官元龜先識隆棟宏材道契千齡雅被宸扆之  
注志存一節夙揚康濟之能輟內朝清切之班體中制  
丁寧之訓頃居輦轂著浩穰彈壓之威旋總藩維妙宣  
布中和之治適交留籛之近益高分陝之釐惟會計之  
名邦控東南之要地必資全德盡護列城說禮樂而敦



詩書寅車元老兼文武而儲將相兩府上公籀夙荷恩  
知欣聞大任敢圖幸會獲備官僚負弩前驅阻趨瞻於  
榮戟寓書拜問但仰託於雲天欣頌之私敷陳罔既

謝高市舶啓

伏念肅旄鉞之高門夙侍先府迓霜臺之叱馭欣耀皇  
華獲佐藩條於海隅遵奉約束於部內仰睇雲陰延頸  
日畿祗服威尊寢露狂斐想望伊邇候問敢稽伏惟某  
官詳雅博通高明獨勝名行兼著可謂克家義利咸和

所祈足國蒔蘭玉於階闥作杞梓於朝廷究觀拔擢之  
新行聽旌酬之績贐琛角齒駢蕃充仞於載輸蠻獠賈  
胡謁蹙趨承於表餌公儲積珍貝之夥屬郡殫驚蹇之  
勤雖不及物而享多儀蓋知取予而獲其寶籀希功展  
效繕性慮才敢不盡心祈於成務緝熙勤恪稍紓曠瘼  
無任歸嚮宗仰之至

迎賀曹漕啓

伏審寵被俞詔召擢計臺親簡淵衷階廷無右澄清畿

輔耳目任顓邱音驟騰封境欽肅大庇宗矚僉論允懷  
伏惟都運大卿智術兼人風采名世籍甚華腴之規範  
聲馳烜赫之閑閣蚤卿月以揚輝薦侯藩而稱職人門  
並重誠第一流資略俱高省察六事高選劇任督課租  
庸居止止以凝祥治優優乎投刃阜民體國蔚摩拊之  
文移博古知今妙飛輓之纖悉方且進思毗副乎文石  
之陞洞澈均斂乎善最之籌惠恤周流莫非豈弟之賜  
盈虛調一必極大受之知卓卓忠勞巍巍獎拔籀莫窺

牆仞詳諦風裁冒尊府之威稜具小夫之敝牘慶頌之  
臆敷述奚殫

賀提舉游郎中

伏審朝掄東委使指擢賢叱馭都門颺舲浙浪旌節光  
華子境部符移鼓動於屬城辱在餘庥倍增係慕恭惟  
提舉郎中學術淵懿資稟清醇達邦克家所履甚厚叢  
劇顓任樂職飛聲闔府倚其酌斟便殿聞斯獻納驚青  
霄之徑路儲卿月之平遷澄攬事重於他司管擁權尊

于邇日課績赫奕誼度敏詳蘊柔嘉弓冶之世修宣臨  
遣絲綸之詔意佇膺大受豈云小知籀毗贊銖分夙承  
顧接體仁人求瘼之畫效鰥生薦藻之衷

回得解舉人啓

啓恭承詔諭甄采儒髦惟蘊藝射科洽于程準屬颺言  
售薦榮與計偕有司慶愜于得人本郡肅祗于勸駕過  
形牋牘有祭芳儀摩厲羽翰寢覺天衢之近騰竽蟾桂  
孰云霄漢之高奉助激昂共同嘉歎

賤發守趙殿撰

竊以壤地相鄰閩浙貳邦之幸會桑粉依賴龔黃統理  
之攸宜寶婺與區獸符重鎮屏翰陪輔撰述楓宸英英  
祕殿之邇聯顯顯雄藩之妙簡股肱謀帥莫如已試之  
良宗屬維城所賴分憂之切寬柔僑寓允屬仁慈伏惟  
知府殿撰朝望顯昂天枝標的溫文足學美政殊稱愛  
崇前蔭以重臨銜袴詫繻而來莫倚成取辨儒雅裕然  
摩拊惠來德澤滂被佳譽騰溢于鄉校英聲速達于明

光諾鳳尾以疏恩持荷橐而非晚清塗寢啓偉績彌隆  
籀鄭重承庥閣踈望履絨題捧辱瓊玖非珍絳帳溪堂  
願輩儕朋而請益板扉部屋已分恬安於私庭懇詠之  
誠敷述奚既

牋紹興曹帥

伏念珍仰達尊恪傾依於雄屏呻呼么末不虛附於青  
雲竦慶高牙拜牋東鎮羈栖僑籍待次屬州未遑詣前  
方此潛退抱寸誠之懇激絨耿邈以薦聞賤疵瀆尊庭

孱借勢伏幸忠恕未賜譴誅恭惟知府安撫敷文展幹  
邦器能挺王臣才節臺閣欽崇乎章奏兵民信憚其綱  
條顯勲天開壓伏諸鎮權機先範素負英猷孜孜撫循  
汲汲理化四明報政九牧颺聲宜居浩劇之司實籍穎  
脫之手朝論注矚簡擢眷優今時魏雒之藩翰疇夙承  
疑之符閭倚遇卓絕恩華邁倫允副僉諧保釐丕柄瑣  
瑣舞雩之子拳拳漑掃之童埏陶洪鈞牛馬下走沐科  
別而人材長育不外索而帷幄寬宏輒引資階跂望甄



品儻辱提攜之舉倍增報塞之衷主諾千金闔門萬感  
恃閩浙之舊吏攀桃李之成蹊佇伸野謀更祈佳惠冒  
浼之青慙汗無窮

牋趙敷文

伏念塵冒朝掄陞陪鎮幕驟躋官局祇竦軒墀嘗偕部  
吏於計臺復俾諮謀於賓佐顧省枵閤但益兢營清冷  
慢閒之具員矜燭寧存之攸庇伏惟知府安撫敷文風  
績開濟資略凝和實德施為金聲玉振思謨獻納繡口

錦心平時魏雒之間旌廣內宸奎之隸職赫寅車而問  
俗允宗望以維翰著勞翰輓於日畿騰價浩穰於天府  
前後淵衷之簡崇隆物望之孚卒乘輯和吏民信憚素  
承睠矚之遇遂擢廻翔之塗治聲徑達於九重朝著端  
追於三節超持橐之選正書殿之名籀流落羈僇侵尋  
晚邁矯首桑榆之邈介懷釜庾之供力任職之罔隳願  
事賢之良幸欣屬之切敷染曷宣

牋交代王宗丞

伏念聯鑣接武參朝禮於都門紋板趨風赴官期於閩  
嶠圖畫莫逆邑里素交豈意睽攜復叨更代強寶婺衰  
慵之迹登稽山佐謀之司蹈襲風規諮度職守伏惟交  
代參謀宗丞歷落青雲之識具高標黃閣之淵源羽儀  
天朝潤色家學挾保邦之懋術懷贊世之令圖翕然遠  
邇之見珍所到衣冠之竦慕如石投水若玉在山著鞭  
遙邁於華塗入幕誤留於外鎮自今加秩命之數超騰  
于伯仲之間籀久荷矜庥多承友益方幸促席而傾展

儻容弭蓋而周旋會覲之欣頌詠罔既


回翟參議啓

伏念睽違星紀羈游隨牒之蹤謨畫日畿同舍為僚之  
契浙湍遄駛齊舫將臨寵貺滕絨記存拊念諮諏幕府  
參論咸推伏惟參議學士德門承則藝苑老成允膺慎  
簡之除竦聽殊常之擢交游慕樂方將薰習於芝蘭將  
吏輯諧密煩部勒於韜略遵海一時之善士在邦三益  
之良朋獲際高賢豈為小補頌詠之懇敷染何窮

答曹機宜啓

伏承泥封青竹重問相存油幕紅蓮行將臨屈東道戎  
機之密上賢諮度之宜煥炳懿詞竦側嘉惠噓呵衰鈍  
激發朽蕪伏惟機宜學士嶷嶷簡僚席勲門之濟美潭  
潭大鎮遙賓位之闕員曉暢軍諮光被朝委設招賢之  
連榻待致勝之良籌聯翩奏報以精詳裁證揣摩之警  
敏聲猷期遠知燭益隆擢杞梓之鄉村登瑚璉之國器  
克家有裕顯拜攸宜稽仰椒蘭異芬愧兼葭繆倚連輿

並席琢磨益友之陪會升揮犀磊落德星之聚過逢無間  
鄙悵自消咏味之誠敷述曷究



雙溪集卷十三

欽定四庫全書

集部

雙溪集卷十四

詳校官石中允<sub>臣</sub>薩敏

主事<sub>臣</sub>呂雲棟覆勘

總校官進士<sub>臣</sub>繆琪

校對官原任典簿<sub>臣</sub>郭祚熾

謄錄舉人<sub>臣</sub>查浩



欽定四庫全書

雙溪集卷十四

宋 蘇籀 撰

啓

牋沈左相

伏念堂號昭文曩瀆光塵之末至班聯布武叨從表著  
之卑微仰高彌隆挹深罔測矜願幸承於談塵寅緣宗  
慕於德門眇分後來不與摠衣之數最爾前躅猶是掃  
扉之人于二儀寅亮之司走九服具瞻之地恭惟嚶嚶

崇嶠岳岳兮那可涯煒燦光輝炳炳其罔弗燭如天有  
斗人所賴以稽疑若歲逢春物應時而華茂日者潛伏  
荒野未遑奉淇澳之章遐屏殊方不獲獻沙堤之頌恭  
惟聖天子疇咨嘉注考慎佑賢珍策良籌不落落而必  
合崇論閎議即語語而見知昨者趣負鼎之裝赴追車  
之詔奏封虛佇帝席屢前神比天同利斷金而莫間乾  
剛坤易石投水之何難矚東穆清尊獎元輔卓然鳳舉  
榮寤龍顏乃畏天法祖之鴻猷述堯纂禹之英槩功利

宣布詔意溥合于朝僉弼諧寅恭典冊歡騰于民聽竊  
惟僕射昭文相公生知先覺自得資深媚茲一人誕敷  
四事稟易之精微潔淨遵詩之廣博易良十二陽秋洞  
開衡鑒二十八宿羅列胃膺鄰國相窺賴叔向無敵對  
黨友咸贊謂臧孫真聖賢千載一時九德咸事國是定  
循於艾獵民心切望於諸梁端挺冲深清疑淵懿熟複  
詳計調揉彌縫號令美新非復前日綱條肅振皆倚公  
誠唐建中八百之除克諧素蘊漢平津暮年而變寧不

裕然考大隆至治之由乃持正不私之績究多方之疾  
患警庶務之弛張革敝蠲煩而勵精之實昭激濁揚清  
而廉直之道啓主善協一維清緝熙邇者紀翟輅之歸  
法宮聖德超逾于載籍擢金管而書偉績信史比大於  
春秋實以睿佐明不膠漆而固以道致主陋管葛之卑  
故內而百辟所儀刑外而庶邦之宗倣籀麓踈潦倒寒  
悴陸湛樂休明附義之隆被教育登堂之舊因此稟咨  
之際聊陳毗贊之詞懇丐聖朝詳味則哲前修貴德而

尊士上臣以人而事君仁義禮樂相求者不隔於顯嚴  
操術方畧可采者不問於讎黨本之以彙進之聲望假  
之以引類之公明取器業忠良豈先代而求士探詞意  
覈實乃今時而籍才酌其可而揣其長度其宜而責其  
効發明無倦課試不輕珪璋昭煥於汨湮棟幹咨嗟於  
勝任駕蹇鈍賈甄藻旌酬書緘安事於常儀德輶誓祈  
於愛助歸附之切造次罔敷

賤陳知院

伏以趙武長上聲弭兵之聘會信重春秋孫洪魁親策

之甲科厭服髦俊據真才而稱職創賢業而競時岳岳  
訏謨堂堂偉績該四科乎闕里聯二八於虞廷若鳶飛  
魚躍之穹卑無逃昭察被桂郁蘭芬之薰染孰不欣陪  
致景山學海之徒皆希顏慕蘭之意仰跂牆仞瞻係聲  
華儻擇其區區之圖亦猶用九九之術比義與道相求  
不間夫顯嚴疇曩甄評流品衷懷於誘掖聲拳鞠之戴  
屬蘊悃款之忱忠激昂之姿謝絕何可聽歌飴於鴻美

俾宣吐於芻蕘或者其渙陋狂狷樂附于寬明博大亟  
蒙冒於英重未悉屏於幽遐大治大鈞孰測裁成之運  
小夫小智豈無一簣之堪恭惟樞密相公本興王之道  
躡先哲之蹤懿醇稟天沈機建事討鄴侯之墳籍草曼  
倩之簡書志大彌綸酬九重之親遇識優講畫協同德  
而贊襄天驕重第一之人世議譽知十之學雲間闊步  
塵外清標仁宅理窟以淵源心匠智囊其警拔帷幄言  
詞密勿樽俎資略研幾豈特文儒所宗可謂大臣之傑

忠規雅筭勝氣雄風將相之所倚毗勲閥必將久大籀  
朽虛羸儻朴野龍鍾投簪延陵之皋敘板巨源之鑒我  
弁已成乎俗韻曳裾來叩於德閤當代之龍津在茲借  
勢之鴻毛欲起蓋矜愚誨短實祈高位之慈求善度材  
是謂上臣之體顧蹇駑之無取或桑榆之可收願觀東  
閣之賓庶荷晚塗之幸欽戴成頌敷述汗顏

牋湯右相

伏審妙簡聖知參酌民譽符夢協卜選衆與能睠魏我



負鼎之英倚卓爾濟川之傑天同神比乾健坤從爰立  
丕圖集賢寵陟右揆崇重百辟由儀詔綸誕宣羣聽驚  
喜恭惟元聖之作自得忠智之臣以誠明典學談帝王  
之規以經術融明演周孔之躅以廟社生靈為已任以  
機籌資略為治功相須急而遇合難弼亮勞而致化速  
厥初則干戈戢而疆場靖歷久則禮樂興而刑獄清將  
俾華夏之治軼越漢唐而隆成周英乂之談微簿管蕭  
而榮當世執此道者公其人哉綠髮珥貂跂其年則不

可及青衫奏藝度其才則彌以高籀俯伏下風竦祈先  
覺嘗獲面台庭而汎掃今榮觀揆路以揚輝磊落兮可  
謂達人精敏而無復滯思傾耳劇目合氣齊心贊元之  
冊已行迓衡之志何遠士遭斯際豈不願諧嗟避地山  
澤之臞睇上公藥籠之物究觀東閣引望後塵略談盛  
美之毫端允超流俗之度外伏惟僕射相公抗浮雲之  
志養浩氣之剛竦壑昂霄拔出倫萃絕編汗簡洞澈根  
源高過秦喻蜀之篇富仙禁北鄙之製魏相好文景賈

董之故實姚崇舉正觀房魏之便宜念天下未獲之事  
措置設施攬海內無窮之材鈎深引達奏御贊書之訓  
大辯英詞夙夜宥府之謨深圖宏斷練典常權變號該  
洽而貫通或澄正改更析羣疑而警切便蕃顯近烜赫  
閒詳外懋九功內苞一德談笑規隨之際雍容造化之  
工權衡效驗於三階鼎鼐調變於六氣裁成聊發其素  
蘊扶持有振於斯文再念猶晚託雲麻稍承風旨借勢  
豈云於借譽附義愈親於附賢欽同中外之所宗致忘

榮賤之殊等游上宰之門闥皆明廷之孔鸞幸世隆平  
逢年亨會區區舊習老未弭忘齷齪小知庶幾一得更  
祈予進乃獲依投焦卷根牙仰滂沱之霖雨塵埃冠劍  
俟披拂於德風慕願之衷敷述罔罄

賤判府張參政

伏審判府參政大資榮分瑞節作鎮殿邦詔命肇新興  
頌歸戴伏以任倚元老日是忠勤體貌宗工均畀勞佚  
治理優於重寄資秩艷於清華未酬帷幄注矚之隆嗣

有鼎鉉絕倫之遇恭惟判府參政大資道侔夔稷學貫  
典墳鷁路鵬程魁浚上俊髦之首天臺鳳閣冠朝中秀  
彥之班周雅老成之典刑魯語述作而信古毗屏弼諧  
之量獻替彌縫之才補衮心精貳公績著勲業更祈於  
大受經筵密侍於清光出處卷舒百辟宗其模楷蕃宣  
屏翰列郡竦其規繩魚符之問鼎來歡呼之聲相屬豈  
圖畿甸有此遭逢猶僑籍小生邊侯賓佐願慕談王之  
風肯奉同鄉校之民瞻吏士浹和郊關相慶輒當斂板

於下道庶幾企佇於前旌龍坂睇高竿牘曷展

賤陳參政

長卿

伏審光膺詔策延貳台司命布幅員譽洽朝野伏惟慶  
慰竊以往諂邦柄卓哉注意之賢參秉國成允矣濟時  
之傑副代工之三事必賚鉅儒擇聖教之中庸莫非至  
道泥運鈞而俾乂石投水以罔艱同符虞典以咨俞合  
契周家於盛際恭惟叅政皇圖極摯聖興思融斟酌研  
幾照微慮遠籠罩當世度宏識優閱機務輓輒而敏詳

誦典故淵源而弗厭出入金華之闥從容玉筍之班稱  
職當官陪鑒扈蹕絕域締好之辯鄰壤綏懷常伯銓綜  
之精臺閣寵劇曩者區區外轉去嚴密邇聯汲汲本朝  
復鑒裁重任須賴新畫東記舊勞巖瞻缺於小知僉議  
期於大受調燮中和有體諮度正始高風攬聽清門進  
讀碑益有言有績無黨無偏處心存忠恕之懷除吏廊  
思皇之量贊教化而美風俗興禮樂而弭兵戎方且鍾  
鼎勒銘表勲閎之顯赫麒麟圖繪著輔佐之隆平術業

範世之全人率履稽古之能躅遠猷明著盛美鮮儔妄  
祈洪鈞僭越愚分厓孱朽儻險阻長塗之劣孤窮攀躋  
無計居二湘七旬之叟憚九江三峽之行敢萌叨竊之  
心實欲便私之計願徙寘於近地軫老病而恫矜覲沐  
生成之慈庶脫顛沛之患故稱賀之末簡陳悃款之鄙  
情慙蕞爾兮鰕生仰偉哉乎造物意念傾吐筆牘荒蕪  
頌嚮之歸敷輸奚既

賀王樞密啓



伏審榮膺中詔進任西樞凡預晤游聚有光幸竊以中  
興開廓賢路體貌邇僚變化鵬鯢駕馭龍虎騁麟驥於  
大路翔鸞鴻於紫霄嘉注奮庸之俊髦咨諏考慎之詳  
諦殫一心以體國申公議而得君啓沃智辯之哲謀揆  
揣幾微之圖慮贊贊夙宵之忠篤明明覈實之聖知恭  
惟樞密相公清警昭融冲裕高峙學推紳笏道著巖廊  
蘊拔萃之姿副異常之獎睿慈東嚮儒效輯成倚馬仙  
掖之贊書批鳳淮南之視草密勿兼官于起部清切爆

直於右垣裁定朝章演潤國紀金鑾密旨蔚瑞世之典  
彛玉清討論信代天之喉舌委紫樞提著述之柄任黃  
閣主文藝之盟奏篇機鑒於帝謨封章緝熙於王度斗  
杓掌武無競惟人鼎飪用和非賢弗乂正始之聞博備  
太平之基愈隆越石偶遭于晏嬰淳髡遂服乎鄒忌筋  
骨翺愈源本軻雄揄揚甄藻以英明咀嚙經濟之能事  
珍策重計懿畫膚功師律將符韜鈴熟講官箴士範衡  
石精明詳味渥恩允旌盛美籀罷更川峽之戍即安琳

館之祠近傳好音下風驚喜附詞林之根蒂託鈞量之  
幘幪繆陳截截之言難寫依依之意

牋賀叅政

伏審光膺詔冊擢翊柄司備鼎飪之燮調際風雲之感  
會寵蹈廟廷之右地諧弼巖廊而契邦奉惟慶慰恭以  
參政某官殿內無雙士類欽戴鎬京辟雍之行藝岷峩  
縫掖之人英一聞疊知十之洽淹五行累數萬之閱覽  
按經籍之成效體時運之適宜斟酌裁量激昂慷慨老

成如周雅所謂調一載孫卿之言青瑣敷陳啓迪迴天之辯金華納誨該詳紹祖之規鍊達發明論萬機之理致宣慈雅正孚百辟之稟承倚委宗工扶持國是嘉猷副宸心之愜可珍策先衆議而廓開文武之遠圖諳戎氓之情偽筭多每強於人意樽前能折乎敵衝作股肱忠智之尤為社稷公誠之鎮莫匪皇王之蹟研暢周孔所懷豈特如仁之前修宜號興王之聖輔蚤日辭繁而避地每祈嗜靜而投閒肖彥先望偉於儒宗似季真道

素而文翰有識擬方乎先哲非常卓爾而邁倫極其所  
建之高明孰測殊勲而茂績將底至治展盡異才一德  
不同千載符契籀卑屑不佞論思老勤鷦鷯體微銜鶯  
非稱鑪步名泯疎野招尤敢忘疇曩之知傾膝酬接必  
冀扶搖之助脫驂見收頑鑛須假于爐鎚焦槁終借于  
河海願見魯衛之士齋被丘樊之安冠劍塵埃簡牘瑩  
燭奮飛驥尾拭目階符

牋陳僕射

伏審光奉冊書進躋宰席顯近詳試協贊虔恭蓋心膂  
堅而股肱良由陞廉遠而堂皇峻覆金甌之褒表加玉  
鉉之利亨先志定於當陽洽言僉於首正造膝討謨之  
湛審爰立慶會之非常槩有識知符同竦賀恭惟本朝  
虛佇以圖贊邦治理褒錫于瑞世真賢忠智揆策而執  
權睿文前席而嚮納上下相須而相濟聖彥相值而相  
求不柰乎樞軸紀綱之條密勿乎章程課覈之訓坐論  
對時之務柄揭援拯之方蘇海內之倒懸次第六奇秘

計削中原之左衽雍容九合膚功料敵伐謀應機全仗  
異士攀雲附翼同辰莫匪鉅才生民將樂於華胥羽衛  
佇歸於浚汴持衡尺熙乎帝載儼端委代於天工致主  
愈諧庇人彌夥伏惟集賢僕射相公毓粹元精稟靈神  
岳間出挺生于拔萃淵懿自得乎時中光明顯融調一  
新美該典籍理世之具纂廟朝循道之規兼四科而有  
光論萬機而至悉可以應無窮之資略故允出益辯之  
彌綸諧弼裁成風采號令等魏弱公之學識切李文饒

之慮圖潛心王體之緝熙盡節國是而翊亮優優措置  
之標的矯矯決果之著龜同輿輶車若左右手接士藻  
鑒故應任耆而邇英及物恩波何勝數計而周度鈞致  
俊偉備患折衝馴擾遐荒橐弓却馬寧壹太平之業運  
用文武而成鄙庸俯伏于下風仁傑宜在於高位跂聞  
寵陟稍欲激昂想廣博之甄評宣自公之元化道義不  
隔於富貴旱暘借潤於滂霖大度高風窺較豈易古心  
奇韻取予無方馳神閭闔引脰符照傾頌之素敷叙曷



殫

牋賀參政

伏以芻蕘屏短蟬衮穹崇注仰儀刑係嚮先覺掃闇自  
幸進階敢祈聽人物子將之評由基命中揆國勢中立  
為範師曠審聲崇論克諧於贊襄珍策發明而挺出品  
裁則哲藻鑒拔才矧茲衰屏之蹤辱在矜矚之末積歲  
希風而慕義茲辰懷刺而握衣繆輸管簡之誠少道鄉  
曲之契恭惟參政丈稽典學之經緯蘊忠智以研幾功

業逐日以新遐裔率服道義得君之實操履昭明誨迪  
溢于封章謬著于臺閣斷金至利淵衷協同正笏稽  
疑具瞻弼亮絳帳知舊並位煙霄黌省交朋擢陞班爵  
棟梁文囿冠冕詞林如舳舳載濟于長川若鋒鏑新硎  
于巨闕遐齡布筭而全擁多祉揅著而可占究宣變理  
之方更展升平之効弗鄙驥跡之駕佇觀羊角之風激  
勵衰疲稍寬窘促均餘光於曲照化瘠鹵為豐穰僭冒  
薦聞卑薄愧懼

賤周樞密

伏以瑞世儒師貢無礦黃金之璞宗工內相嘉起草白  
玉之堂擅美標奇密勿自結於榮遇開懷前席從容褒  
倚而奮庸向者詞令鏗錡耀輝華於日月乃今樞機陟  
恪契感會於風雲鞏固太平之基彌綸掌武之柄多筭  
却敵全策憲邦獎王室于尊強訓戎容於果毅竊以拯  
天下之急者宜仗哲謀奇士廣聖時之教者必擢宏博  
藝人璆琳珪璋皆萬乘之器使股肱喉舌惟九重之簡

求進陪論道之司欣慕得賢之頌恭惟樞密同知雅邃清韻殊特軼材既讀典籍而逾五車不出樽俎而見千里辭科中雋文苑樂推貫道理而養其淵源窺閭奧而不見畛域用意遠邁典故該明若楮馬入閤而陳謨如高崔應問而白事專對見蘇卿之節甄綜齊盧毓之平化率百僚而表庶徵威振五兵而遵七德敷資略智辯之傑付竹帛丹青之傳獎鑒人倫作成品藻門閤誘掖海寓儀刑籀念巖跂龍津幸海納槐府奮詞館之藂質

瀆廟堂之具瞻自揣頭顱只合躬耕於隴畝扶持門戶  
不忍遐棄於箕裘顧丘壑之芸樵睇江海之膏潤願垂  
渥澤所藉涓流敝帚荒言之麤駭鹿華軒之峻珍頌之  
切裁染奚殫

迎嫠守周侍郎啓

伏審命移江介寵鎮輔畿歌股肱之良風聲洋溢見節  
旄之美道路榮華竊以圖舊念茲清衷遴選重寄親擢  
褒嘉出綸汲汲共理求瘼之功優優中和樂職之頌朝

魚竦其挺特士庶慕而歸依曩者恭惟知府某官侍郎  
蘊道藝之端誠際德音之延納登禁嚴而極臺閣演聖  
籍而侍宸帷封章感達於穆清禮樂飫陳於竒論自詭  
一麾之佚曲留三節之期準的列城之師光輝九牧之  
譽蓋鄉黨健訟何煩繁露之春秋課督稽違暫屈次公  
之精力攄智能高妙之政推公明豈弟之誠籀忝預僑  
人欽跂公望田疇務穡之隙溪堂請益之初欽庇乃情  
敷叙曷究

牋判部汪侍郎

伏審祗膺上簡擢貳天官疇咨右賢入從禁塗之素倚  
矚華選欽傳諧訓之辭甄鑒俊良朝紳鉅蔭叢爾瞻依  
之下客震于舊治之名邦奉雙鯉以裁緘歌棫樸而稱  
慶恭惟判部侍郎英嶷清懿之望絕倫茂異之資抱器  
識股肱之才炳光輝魁躔之冠章奏處畫傾省寺而慕  
崇修述建明翕詞林之跂嚮曩者召還祕府談言居易  
之傳兼職儒官介節亢宗之比得靖密之風以在位敷

警敏之慮以取名中外展措世之休功論辯著戴君之  
至分方將全太平之盡美補大化以變調臺閣訏謨國  
家深策準的毗益於邦政經綸究觀於日新乃術高於  
稽古揣摩之多智出於審官拘攣之表豈惟銓管之有  
叙必致淘汰之知人量推多士之先藝蓋大廷之右何  
止揮紫宸之翰亦將參巖廟之圖某冗齷凡流夙僑屬  
部偶合一詞之善遂蒙溫厚之顏以道相求非萌心於  
祿利引經相質期析喻於知聞欣承省上之初開慰時



機之會

牋陳左揆

伏審丕顯休命超任元台親寵冠於百寮宰制通於四海誕傳渙號盈溢歡聲竊以三公賴於全人二柄萃於一品惟當宁御世之具代天為工惟大臣體道之誠與上協契其施教正俗俾比屋嚮道而回心其頓紀正綱必全策察微而燭遠提持萬務之湊獨幹一轂之樞悠久無疆邇遐叢仰恭惟左揆僕射相公淵懷卓瑋峻範

清宗端本適時長慮却顧負聳壑昂霄之器若造舟成  
厦之資挾鄧仲華之文明兼宋廣平之風度勵精疑弼  
罄憂勤之百為宥密巖廊乎終始之一節在璿璣而均  
四氣負鼎飪而和庶官穆如景風霈若時澤課覈精於  
致理績效著於僉言黼黻之注倚敦隆彌綸之志氣剛  
健消祲沴之災患賴雄俊之修攘荒裔來王祗憚坐籌  
之真相多方允乂咸歸維石之具瞻舒緩佩紳渾同文  
軌平寧六合之責塞圖任積賢之功昭化馳如神風行

無外籀伏念時數偶合視尺璧為至輕鑪錡首當嗟頌  
鑛之必化

牋楊參政

伏審舉任中宸參毗大政通吳蜀之中外鼓命令而懌  
欣在於下風孰不竦慶丕欽進賢之禮咨嗟理世之圖  
明良相求魚水合契所以答斯民之望固當先寰海而  
憂禮貌之嘉注特殊僉同之推予專屬以其得十而舉  
一殆非小能而大知訏謨萃於清衷絕識明乎畢覩適

時之傑捨我而誰恭惟參政六事之貴夏官納言萬人  
之英春闈舉首內庭書命之雲委臺閣撥劇之鼎新百  
篇奏御而副憂勤十策發揮而破疑滯公正如白居易  
篤實如鄭文明喜籌筭而敦簡編規繩管葛探索丘而  
稽經律根蒂孟荀深乎帷幄之言至矣樽俎之畫彌綸  
廟論弼佑國鈞機柄得人猷為濟治方且變理至和之  
氣扶持大化之源毗厚太平之基振起偷薄之俗蘊懷  
建事其巧妙而功多酌古制今必天同而神比鍾稟岷

我之靈秀肇新旌節之閑闕由危科而寤睿文夙有故  
事居複門而升二府亦若前修謙恭愈崇靜密不伐文  
武之宗慕彌固才節之齊量無涯何止於咸乂軍民殆  
將以永安夷夏致緝熙光明之效皆謨明弼亮之諧籓  
瑣瑣卑凡拳拳傾嚮藉鄉枌而瞻几杖蒙顧接而先品  
流幸待次而僑居政屏身而退伏霖雨之渥無間權衡  
之審願遵長鈇每彈竿牘小智欣屬之切敷叙奚殫

迎知郡吳侍郎啓

伏審詔音新渥使符舊邦天臺鑒裁奉方隅之殊簡地  
官劇柄虛畿輔而輟賢聲敷道塗欣溢鄰壤跂想旌旗  
之色掃灑甘棠之陰恭惟知府待制侍郎懿實光輝淳  
誠暇裕淵邃士林之標矩雍容國器之珪璋論議建明  
適宸衷之虛佇枉直獻替欽柱下之威稜登高攬轡之  
澄清啓沃前席之諧允酌王度而裁國制幹運變通調  
軍賦而節貨泉鍊詳取子究穆清之重委無中外之密  
踈聽子淵宣布之謠流次公豈弟之政期召節之何遠

奉奏計于片時，稽夙蒙庇于雲霞，久偃伏于風範，心誠素依於惠愛，氣合渴願於趨承，引領貴閣，繆裁訥啓，龍坂可登之際，毛穎無畫以陳。

迎丁侍郎啓

伏審出綸遴選，剖竹頒符，輟獎倚之貴塗，畀股肱之上郡，簪紳愛戴，道路光華，凡在蔭庥，孰不斂衽伏以知府侍郎某官，懋顯印之膺，仕彰瓌璋之清，能黼黻親除，睠渥蕃宣之顯，拜臺閣名品，參聯上列之英，躔例持橐而

橫經亦分憂而剗劇精覈詳諦之老手該廣允切之周  
才惇仁民馭吏之條懋正躬公聽之政髦節部伍談笑  
而齊肅朱墨棧檄紛錯而有倫聲實軒騰何止徐陳之  
輩謨畫淵懿超出龔黃之前稽慕樂事賢耕稼封部弗  
因刀筆之末伎曷表景仰之衷情恭惟高明不見疵謫

牋越帥吳侍郎

伏審光奉綸旨妙簡鎮東顯拜惟新柄兼文武俞咨榮  
獎器倚功能權均九牧之雄任搃十連之要建旗植榮



列城遵聽於稟承飛檄頒條庶政恪祈於撫御勵禁闔  
之精采詫嘉褒於盛時恭惟知府安撫殿撰端靖先勤  
慈良凝重天臺司會物望穹隆華殿論思章表臻湊禮  
律國僑之詳允考課次公之精明重臨餘刃之何勞亟  
去衆情之懷睽會稽曳筆將庶瘼之盡蠲駟使賜環必  
三公之遄召蘊抱巖廊之矩範睠注彌綸之設施理體  
當然輿談共屬伏念籀耕耘代祿造請承顏淥水紅渠  
不圖幸會象籌韜略誤真空疎祗悚軒墀諏度職局更

睇上術之提掖願殫下走之揣摩說禮樂而敦詩書巍  
巍大帥之威惠秉刀筆而縛繩尺瑣尾賔僚之講求歸  
慕忱誠造次無數

迎喻提舉啓

言念昨者際晤標表悚承聲音實未容請益而質疑又  
未許升堂而望室留落頑薄邂逅邈睽慕文儒博約之  
規平生咏歎展部使公參之禮今者幸遭眡鎮東油幕  
之僚拜記室泥緘之稟塵埃俗狀玷瀆高明通下走之

微情慙古人之三語恭惟提舉郎中端敏聰哲士林所  
宗恢廓公廉朝僉允洽課績權衡於邦計學藝冠冕於  
時流銅鹽之幹浩穰朝廷之知倚辦任分臺察事重按  
廉諮訪度諏致精力乎五善稽遵庇覈察殿最於六條  
豈弟布宣優游有裕攀援交態納卑吏之見趨徐聽召  
音佇名賢之虎變籀附山仰德補隙寒官受任權輿於  
代更卑飛上賴於寬政親近門閥佩服訓言嚮慕之誠  
敷述奚既

牋紹興帥陳左揆

伏審詔恩倚重時推良弼之名高鎮拊仰成衆附爰立  
之望允聲華甚耀控督維雄屏毗王室之忠勤表率海  
隅之政理頒行旨意振激幹能屯營訓齊閭里咸乂不  
忝陶鈞之賜將蒙調一之宜伏惟判府少保安撫大觀  
文相公精邃誠明公正慈惠偉度當朝之柱石妙略應  
物之權衡經綸宗璟之才該貫孟楊之業篤尊主贊邦  
之畫慰傾耳拭目之儔簡注彌深寄委特渥冠先九牧

之方伯不晚三吏之贊元宣化承流素同心德糾姦旌  
善度遵律文綱條整頓乎藩州課最優隆於江國霖雨  
卽霈但輿論之不伸薤水風流實吏戎之欣幸頌舊德  
尊賢之誥歌樂職宣布之詩念僚屬景仰誠心顧追鋒  
未諧迅召親依提誨奉行教條仰戴欽崇荷戢欣竦

雙溪集卷十四

欽定四庫全書

雙溪集卷十五

宋 蘇籀 撰

辭

秋辭三首

澹天高兮景徹警鶴鳴兮霜曉何旻天之疾威絕千里  
之寸草蛩嗥聚而更咽鳥認葉而驚噪息人心之浮競  
韜狂志而縮爪聳南阜之高稜睨快鶻之騫矯手不去  
於楸上思胡為乎天杪惟古人之奇懷超獨覺而遠到

乘千里之遺風獲萬仞之藏寶吞日珠兮月露瑩心精  
之雪澡

其二

息恢台之燠燠兮金俯凝而火流天風淒以首繁兮悲  
五勝之王囚下何草之不黃兮上何葉之或留維九華  
之采采慰吾人之好修揉穀螺兮豆漆幸汙邪之滿篝  
居老氏之藏室揖丘明之素侯鞭叱羊而視後神為馬  
而天游恍鈞天兮帝所俯崑閬如浮漚畸於人而自然



捨吾道兮焉求

其三

始吾登兮終南既而陟兮崧丘縱風行而雲卧凜石瘦  
而潦收日昇上兮跣丸山滌靄兮脫裘豁二儀之大全  
得三秀兮巖陬獨策馬而歸來芘郊葦兮三秋情廓落  
其何慕求骭髀而與謀心八極而氣完得逍遙之至游

烏石山辭

翟子示感春之  
賦酬之云耳

吁嗟卷

平聲

然又何碑兀巉峩兮元氣肇判宇宙同出兮

韞櫝靈異噫欠雷澤兮煙霏霞靄倏忽增易兮松桂蘭  
芷瑟瑟鬱鬱兮鳥獸呼嘯萬籟叱吸兮九仙差有在左  
相直兮兩峭二別疑若相敵兮山腰木末門宇髣髴兮  
背丘面郭負鼇之脊兮崖垠樹趾嘻呀而蹠兮巢居不  
慄未嘗愁寂兮正北臨窻聞見廓闢兮平臯茫茫中起  
萬室兮惟南華确穹無磴級兮殫覩稼穡瞻于海域兮  
浪莽東西奇峭拱揖兮白雲步武清風肘腋兮所謂伊  
人可哉真逸兮焦桐無絃羽衣鹿幘兮三十六奇嬉笑

莫逆兮喬松心期羨門操術兮援下取飲折松掃石兮  
掛氈薜蘿採杞芝朮兮索隱龜枚象形鳥迹兮失郊島  
病晒班左癖兮神器未泰宵衣旰食兮胡不揣摩誰先  
著策兮兀爾忘機羣狙狎適兮一旦飄然鋒車汗赤兮  
乃翁入覲道隆前席兮迂意鹽鐵吏隱常秩兮鴈蕩天  
台二美無匹兮朝夕問津金堂玉室兮咄茲守株捫崖  
揮策兮珠遷別浦玉剖蒼壁兮棄灰漚紆山水改色兮  
山中畸人記予游集兮鸞鶴悽怨琴裏太息兮長離千

何駕言空碧兮扶搖億萬雲飛水擊兮憑據顥蒼希夷  
為一分夜呼孔賓世紛何惜兮

頌

伯夷頌

人而巍然百世之下豈非以其道也義也其積不善遺  
臭永久至於寒浞盜跖豈非反此而嗜利貪得乎故義  
利之分夷跖之徒今夫長國家者豈患無賄患無令名  
調盈虛論取予者豈患無獲患辭不正耳遠佞人而國

強矣百姓足而君足矣義之所在則勢之當然也此論  
非高也此理易行也而或者以為不然何也貪利者不  
顧義也偉哉伯夷正心誠意非其義也非其道也捨生  
以求其志委之以天下且不受也其治國家範來世係  
安危得失之重確乎凜乎揭日月塞天地何其顯且大  
也斯道也窮之益闕仰之益高從之則治違之則亂于  
今天下澤不泯焉彼伐國之謀與賊民之政求富之志  
彼何人哉予聞耆德語近時風俗之敝曰數十年來士

風頽陋公卿言利於國蘊利於身遞相視倣惟官惟賄  
謀家奉已而無愛君憂國之意謂古人為迂闊賤守節  
為不通背正路而趨市道所謂能者如此喜事邀功者  
為目前之計興無名之兵誅求斂剝半錢無遺一毫必  
析所謂賢者如此斯謀斯猷未嘗廉也四維由是喪邦  
國由是亡其旤至於噬臍天下塗炭豈不聞伯夷之風  
乎嗚呼伯夷所謂不可者武未盡善也鄙夫何足算哉  
伯夷之與世人相去何啻萬牛毛也噫鄙夫聽焉豈不

稍廉耶理亂之機予忍默而不言乎世之君子能附伯  
夷之末光孟子所謂興起者此也譬如鳳凰翔于千仞  
顧餘人碌碌如烏鵲輩攫搏以爭腐餘良可悲也彼分  
寸錐刀汨沒而不疑者固未聞此耳

青詞

代醮詞一首

伏念妾隨夫干祿去秦走閩流落五年疋屣數口脫違  
戰國貪艱關之路途瞻仰昊天荷生全之大德繆忝參

佐累歷驚危顧方隅風氣之異宜或妖孽癘疵之莫測  
上瀆蓋高之聽深慙久禱之誠誓願干戈不歷於見聞  
骨月永遠於災瘴省躬懿戒直心道場妄無任

祝文

奉安鎮閩王

維神消禳患災仁愛國土聞于行闕加崇大號恩寵甚  
渥名實相當籙等欽奉新命書勒標榜繫聰毅之鑒錫  
安靖之祥伏惟尚饗



左右侯通用

維神變動不測慈故能勇部使敷奏加賁封號煥列侯  
之顯服慶新命于舊邦謹卜吉辰揭茲巨榜人神胥悅  
家國用寧伏惟尚饗

謁廟文

猗奉朝命貳州治中視事之初虔謁祠下慙其菲薦冀  
達忱誠惟恃聰直罔不庇鑒庶幾學道及物魔障永除  
私門咸寧靈輿收賴

衢州辭諸廟文

避親改命暫貳本邦柅車劇暑荏苒小春聰直鑒庇首  
末寧謚解印奉辭敢伸虔荷歸誠之懇伏惟尚饗

禱雨靈康

年月日三具位以精饌香燭酒果之奠告于靈順顯佑  
廣惠王之祠惟王庇鑒疆土揭雨暘柄至于弭寇兵招  
海賈皆陰騰顯相爵秩尊嚴禮崇饗答某等被命莅州  
視事伊邇涓日躬薦念連歲災旱稼穡焚如比屋艱餒

賦入匱乏神貺邈然今茲上春時澤未降麥隴焦乾井  
泉枯耗嘉生懼殞民情磬磬將為道殣某等無庸宜當  
咎責惟王大慈大力仁惠此方敢以瘡痍上煩救護謹  
齋祓歸誠慄慄危懇聰直矜惻於赫靈應誕降甘露溥  
潤山藪高下咸均歲事豐康闔境一心永永虔報

祭文

祭寺簿李治表母孺人文

嗚呼漂水里中蔚然梓樛夫人內則訓子相夫衆云子

才必大門閭銅墨寧省斑衣安輿鶚薦三節文石曳裾  
亨騰撫仕天旨恩俞館殿之階丞卿之儲期頤家服甘  
毳哺烏慶崇藝萱變駭隙駒翩翩粉旌冥冥其居酸楚  
悼戚行路欷歔冠蓋走唁弔客千車某等同官為僚義  
敦友于祖載有日助紼指途欽薦一觴以致區區尚饗

代祭潘少保相公

惟昔先正岳岳鷹揚差肩英衛紀于旂常載勲盟府烜  
赫顯昂公奮妙齡玉韞蘭芳好節慕聲蹈履允臧出降

金根甲舍康莊穠華異數視儀真王譽望器懷搢紳鏘  
荆魯館秦臺帝婿耀芒貴戚溫文將種慨慷宸扆眷懷  
獎子輝煌齎鉞建旄青氎弗亡尊爵亞保書社歷陽弭  
貂相祀班列所望重侯累將厥閼愈光某獲陪從荏苒  
星霜不遺英重鄙棄老蒼俛仰幾何卧病在床一代風  
規夜壑舟藏傳襲子息蟬聯不忘翰藻如新弔客涕滂  
昭歟爽靈薦此一觴

莫亡兄尚書龍學文

維紹興二十六年十有二月戊戌朔初六日癸卯弟持  
服蘇籀與簡策謹以清酌庶羞之奠致祭于亡兄閣學  
尚書仲虎之靈嗚呼肇基二祖潁川有蘇希古孫陳宣  
哲世模步趨陪從探討詩書咨倣闕里吟咏而雋郊廓  
松楸墳籍衣孟簡編續傳吾道豈誣公弱敦敏耽玩經  
旨康成王弼風雅彖繫語孟檀弓發微究體斟酌心精  
應用詞綺炯然獨識灑落清製緼袍顏巷淹此國器偉  
歟東坡百代之師公其元孫家學在茲舉朝注之賈嘉

子思真主龍翔育材馬棧廟廷評衡俞音首東橫經資  
善注記黃省舒華發藻不隕先範忠告之求宜居給諫  
超據西垣代天筆舌綸言雅興封章密勿第七屬車甘  
泉世職請問論事燕閒玉色兼官彌近臺閣跬步命實  
迺遭三返岷峩天涯地角水陸奔波牧守鄉邦程路邈  
遐排抑根却奉祠婆娑惠洽鰥孤薦多寒遠推食解衣  
周給衍衍待人孔熾自處疎淡克家之珍佐時之彥籀  
等無堪友愛豈弟採其偏長矜其不至解手脩門尺書

相繼竟不一面襟抱曷既計來西南宗屬殄瘁陟岡靡  
瞻揮涕雨淚秩大常伯七旬何懟正一誠明安有淪墜  
下從高曾即夢濟美斷刻鄉枌德音不昧念夙飫飲擎  
跪奠酌嗚呼哀哉尚饗

墓誌銘

故中奉敷文閣王公墓誌銘

代伯父侍郎作

某之先伯東坡公先人藥城公夙從太原伯敷甫游嘉  
祐文安公猶子也以能出入持節浙部時弛危弦以寬



瘡癬詳諦警切見遠識微之明僚友賴焉以為有不可  
及者子家侍旁冠而締姻欒城以妹氏歸焉蘇宗五女  
倫次李壻也公蚤仕勞勤晚為郎出按閩部資望彌峻  
朝廷以欒城舊德施澤藉公才節圖任之意炳然以莫  
齒非可進為自詭退休脫落紛埃秩琳宮凡五禩紹興  
二十三年七月二十六日以疾卒享壽八十有五棟等  
纍然苦次謀所以葬具行事爵里求為誌銘某不容以  
老勸為解謹按王氏本姬姓在太原祁縣者八世祖項

為後唐輝州刺史子孫避亂徙居單州碭山去應天不遠至國朝移家于應天虞城曾祖諱漬通守泰州贈太師中書令兼尚書令曾祖妣徐國夫人仇氏祖諱純臣任濮安懿王宮教授遷河東漕贈金紫光祿大夫祖妣建康郡太夫人吳氏父諱廷老任兩浙漕左宣奉大夫妣碩人元氏所生令人何氏公諱浚明字子家熙寧八年以世賞補太廟齋郎少敦柔警拔屬詞日課千言緝熙事業令問發聞於吏理向公不擇劇易健敏曲全元

祐五年任宿州司法歲滿調陽穀尉老吏宿猾斂戢讐  
伏紹聖間河決新堤東注眉丘陽穀正當其衝老壯遷  
避盜賊乘間充斥敵聚朋扇一日之間至十餘萬本路  
安撫使發將兵捕襲渠首竄軼餘衆徬徨無歸公慮武  
人貪功濫殺非辜旂榜喻以禍福大書招出誘陷之人  
姓名于其衣背以圖印記之分遣歸業但推首惡主名  
報于帥司及統兵官由是所全活者動以萬計徵公良  
民幾至塗炭以不自言功故無賞典建中靖國間辟陝

右茶司官屬舉職最聞諸司交薦遂遷京秩授真州六合又沂州新泰兩邑事叢務劇民大服其政既去思之如父母然政和三年賜五品服掌金耀門書庫丁所生何氏憂服闋通判婺州終更提舉福建茶事建炎初建卒為亂凡職掌兵民之官束手顛踣公誠至豈弟衆所共知一言撫存千夫帖然由是魁首就戮朝廷諭貸誣誤許其自新遂以又寧除知泰州敵騎犯邊江淮塵擾孤壘守捍沮遏其銳以功遷直祕閣改知建州初郡中

有招降賊兵數千屯駐已而復叛坊市盡為誘脅賊黨  
偕竊勢如蜂蟻公徐行避寇以仁厚素著賊不敢害上  
章自劾除領宮祠復起知秀州未幾又授亳州不果行  
紹興七年賜三品服改知常州未赴間召拜尚書兵部  
郎中尋遷司勳郎中久之領福建漕計朝論委重陞辭  
條奏民政賦役筦推時宜糾姦禁暴之畫上意嘉之到  
官芟煩解統盡蠲積弊儉出薄入闔境歸厚建安歲貢  
新茶官囿素號膏腴而墜培鹵莽歲頗不登循習取足

私園鄉戶買茶輸納病於侵擾官圃科撥荒廢公始議  
補治區壟增茂歲入優裕民力益蘇土人德之建生祠  
鐫碑以頌其美公止絕之事寢上聞詔陞直敷文閣替  
歸朝命爾領宮祠實以優佚其老遺表上陳遠邇士流  
興嗟嫻黨吒惜曰哲人亡矣公扶危拯溺心如金石解  
紛釋結信發于聲仁形于色故亂庶遑定奉上臨下未  
嘗諂訐交際酬酢之間謹審抑畏與物虛邪故無怨惡  
蓋飫聞虎達之訓切磨薰染其中所養者厚矣非止篤

於行世之道也中饋慈懿姆儀溫淑故鞠子衆多無不  
均一仕宦七十餘載歷任二十官階至中奉大夫勲文  
安縣男尊榮壽考可以無懟矣諸子以是歲十一月十  
八日葬公于蘭溪縣紫巖鄉昭化寺之南麓蘇氏令人  
祔焉從日者之言也男八人棟通判鎮江府植從政郎  
棟稅楫權從事郎柄棧通仕郎女六人皆適良士孫八  
人銘曰 顯顯文安燁赫宗盟負奇堂室弟姪奮能惟  
公父子嗣烈其馨位不稱才實浮於聲百鍊明斷龍泉

青萍世值紛揉當官而行翺浮之伍失據隕生公仁而  
勇排難定傾從容頤指汰濁理棼氓戎寧壹克不失刑  
纂文安公拊亂疲精菑穫伯敬惻怛公誠治洽雍熙遇  
文王興善類見知郎于夏卿七閩瘠土惠澤薦零庶幾  
古人攬轡澄清隸職宸居敷文禁廷壽登大耋八子簪  
纓陰隲闡邁羸金六經性如植德龜食佳城誰其驗者  
東晉景醇委祉叢休殆莫與京

雙溪集卷十五